

萬曆

泉州府志

第六冊

十三至十五卷

泉州府志卷之十三

武衛志下

武蹟

五代 王忠順 林仁肇

王忠順晉江人初閩王延曦爲朱文進所殺忠順與留從効董思安謀誅文進所署刺史黃紹頗奉建州王延政爲主後南唐攻建州忠順復與思安率兵赴難城陷忠順死之

林仁肇永春人姿貌雄偉有機畧膂力絕人仕王延政爲建州裨將後歸金陵用師征淮甸遣仁肇

出援壽春及後濠州水柵累有功授淮南營屯應
援使勅周師於正陽亘浮橋而渡仁肇戴芻藁將
燒絕之爲反風所拒火不及發合戰而退仁肇獨
乘軍騎殿其後周駙馬都尉張永德射之矢發直
指仁肇口喝曰老漢中口仁肇忽俛首矢遂上越
永德悵恨不能釋使人覘之乃仁肇也嘆曰彼自
良將豈易圖乎及鎮潤州有政稱後爲南都留守
宋忌其威名行反間南唐主疑而殺之

宋 鄭振 劉寶 陳敏 韓俊 王大壽

卓子信 陳士英

鄭振安溪還集里人建炎中賊楊勅寇安溪振率鄉兵禦之賊宵遁旣而賊曾少龍周老虎何白旗陳大力詹鐵義等擁衆數萬寇掠郡邑帥司檄振擊之賊聞遁去越年詹鐵義復寇勢尤銳振率衆與敵手力數十人力不支死鄉人哀而祠之

劉寶不知何許人紹興十五年山寇出沒汀處浸及惠潮漳泉命統制劉寶將兵討之寶往來諸州紹興十八年泉士民乞留寶收討餘黨於是詔本路帥司統領陳敏及汀州翟阜溫立漳州周皓盧真等皆聽寶節制寶分柵要害遷教場于州北合

諸軍教閱焉賊平寶回留敏彈壓先是寶提師欲往漳州捕茶寇會禁旅憚遠戍謀出城爲亂寶知設伏擒戮其魁仍遣其當戍者郡賴以寧

陳敏石城人精騎射有韜畧能御士得其懽心初率家丁入閩討賊兵帥薛弼擢爲漳泉巡檢時車寇跳踰山谷敏往來龍巖漳浦永春德化間勦蕩悉平民德之所至皆爲立祠以功歷遷江淮都統制卒贈少師

韓俊開封人沉鷺有謀淳熙中閩部土盜竊發孝宗親擢臨遣諭以久任在軍二十四年拊御訓齊

有古良將風

王大壽晉江人爲左翼隊將紹定五年海寇王子清犯圍頭郡守真德秀遣大壽領卒百人防遏猝與賊遇奮前控弦斃賊十餘人後無援遂沒然賊亦奪氣官兵乘進遂有沙洵之捷俘獲賊首林添二等剖心以祭事聞贈官恤其家

卓子信永春人爲縣隅總開慶元年春寇薄永春縣境子信率民兵鼓行敵之賊爲之駭兵以非素習亦潰子信被擒賊以其驍勇欲降之不從遂遇害寶慶六年郡守吳曷表其門

陳士英永春人爲縣隅總寶祐六年冬寇犯永春境士英率民兵二百忽遇賊衆猝至衆皆辟易士英獨掀髯奮擊力不支死郡守吳昌表其門

舊志有候官陳韓列在武蹟第韓起家進士嘗知建寧府歷官叅知政事節制江西福建廣東三路兵馬有武功福州列之名臣建寧列之名臣故武蹟不載重之也

元 龔名安 鄭壽

龔名安晉江人至正中以才能辟宣慰司奉差入奏事京師丞相奇其才擢上田縣尉累遷泉州兩州場司令時西域那兀納等竊據泉州殺戮甚慘分兵掠興化將侵福州福建行中書省與師討之

用陳駭計遣人由間道密檄名安募義兵于海濱
那兀納逼民爲兵名安謀州民佯許之而令子及
婿率舟師以俟官軍及至勢合遂執那兀納檻送
行省時名安功居多

鄭壽晉江人讀書能文蚤孤事母盡孝由千戶陞
宣武將軍上萬戶至正間萬戶賽甫丁阿迷里可
叛竊據泉州壽謀討之機泄遂遭害一門死者數
人第宅盡燬子孫離竄泉人傷之

壽以武職謀討賊雖未成功自

當列
武蹟

國朝 李思鄒 武成 郭榮六 丁遠 童乾震

歐陽深 俞大猷 鄧城 張養正

王世實 林武直

李思鄒晉江人有勇力少讀書知大義正統十四年沙尤賊據黃山民望風奔投曾思鄒往思鄒叱之曰我太平百姓從汝輩作賊耶遂以義倡鄉里從者四百餘人立柵禦賊戰屢勝一日大霧咫尺不辨賊襲柵衆倉卒奔潰思鄒獨率六七十人當柵門力戰死暨歟顏色如生

武成順天通州人先世授襲泉州衛百戶成有武畧善騎射禮賢下士正統末沙尤寇發成累立戰

功歷陞太衛指揮僉事天順間龍巖上杭寇發復有戰功成化初召至京陞福建都指揮僉事總督海道

郭榮六永春民蘇里人少習兵法智勇絕倫正統末四方寇發大姓尤麟兒揀其子弟及鄉之驍勇百餘人聘榮六教以攻刺之法已巳建昌寇鄧茂七起麟兒率鄉人築寨于白鶴山守之賊酋陳敬德由德化入寇榮六引精兵逆戰大敗之被流矢與歸賊方掠永春而憚榮六遂聞其被流箭死遂率衆攻寨榮六裹瘡督戰木石矢銳俱發賊見榮

六駭引去榮六尾其後襲擊大破之是年八月賊
劉小姑有衆數千典史陳綬召榮六計之榮六曰
賊衆我寡當以智勝乃使官兵陳于釘嶺東南而
自引精兵六十人從西北疾走穿賊中出釘嶺與
官兵合賊見之疑焚壘悉衆逐之榮安伺其至半
嶺反兵逆擊官兵從之皆殊死戰賊進退失利皆
投坑以潰擒斬無餘十月又攻破賊於南安上塔
前後凡十八戰皆捷布政使金 知府熊尚初親
臨獎勞子景二有父風漳寇溫文進起景二守白
芒坑賊不犯境正德初年流賊道永春景二率輕

兵達之上畚大殺賊景二乘勝深入後鋒弗援速
沒從死者十二人知縣柴鑣建義烈祠祀之義
烈祠所祀有尤新五沈朝美杜榮茂廖時通陳乾
瑞范文華蘇端舉李成張周育蘇舜寧蘇甫進何
廷煥陳朝宗張瑤章吳璇義莊廷實蘇龍二朱祥
逸鍾旺輝郭顯七郭惠四郭惠九陳德克林啓九
劉富旺蔡王智王元珍黃子孝陳顯清黃子明張
元宗陳良凡三十二人皆嘉靖元年二年三年知
縣柴鑣所募義士戰死於陣者與郭景二凡三十
四人

丁遠全椒人先爲興化衛指揮僉事成化間部使廉知其能調視泉州衛篆清白勤慎撫恤軍士號令賞罰明信驕卒悍兵一時屏息甫三年歸興化尋卒泉人思之

童乾震含山人先世以軍功歷陞本衛指揮僉事乾震志行卓立縉紳重之嘉靖癸丑倭寇浙直等郡時太平日久將怯兵弱輒虛冒陞賞乾震居常憤之至乙卯倭奴入寇由海口登岸犯福清勢且南下當道檄乾震與兵三百震故貧貸金結客與家人訣而行逼賊里許爲營分兵巡邏屢有

賊避之當道因督令進剿而分指揮劉玠兵為援
乾震約日與賊戰于東岳自己至晡殺傷相當山
後援兵不至賊覘知四面攻之乾震力不敵遂與
義士陳學書等先之事聞劉玠抵罪乾震褒贈立
祠于孫陞襲二級

歐陽深南安東田人少為郡諸生性慷慨家世饒
貲深以好施盡之人亦以此德深嘉靖丁巳以後
閩被倭害日慘壬戌復合叛民數萬發掘墳墓求
貲贖尸人益洶洶深時以納級授泉州衛指揮提
兵拒賊筭江嘗從數騎直入賊中觀其虛實賊素

畏深不敢害深歸遣人諭以禍福賊率衆來歸者
不絕深結納出於至誠日以私財市牛酒犒賞之
選其悍而鷙者置左右不疑人皆感憤樂爲用嘉
靖四十一年春率兵攻賊施思備等於東田鄉破
走之遂進勦青陽陳村下衛等處賊酋高老等遁
五月間進攻江一峰諸賊于雙溪至于尾嶺山徑
連破七寨復進兵英林潘逕等處擊退李五官擒
殺韋老等遂追剽水田下渚等處斬獲倭賊百餘
級乃遣人宣諭謝愛夫黃元爵陳子愛等俱棄甲
來歸散其黨萬四千餘人於是賊酋蘇光祚康大

福等聞風各來歸獨江一峰李五官等遁據沿海
擁衆尚有萬餘深遣人撫諭解散乃督千戶王道
成百戶百希周分道追剿生擒江一峰李五官南
蠻老施思備王二千李三貢等一百一十八人獻
俘斬于市泉郡始寧論功進行都司其年倭破興
化城盡掠金帛出據平海衛伺舟出海軍府檄深
應援兵次東蕭與賊戰斬首百餘級乘勝直進賊
來援者衆深與部士薛天申周岳鎮等血戰益勵
皆死之事聞詔立祠歲祀錄其子孫世襲指揮僉
事深自太學納級歸書唐人詩句家散萬金酬士

死身留一劔答君恩于壁至是不負夙志云

俞大猷泉州衛百戶少爲諸生工易學乃習武經
嘉靖乙未舉京闈第五人擢正千戶守禦金門以
將才薦擢汀漳守備破海寇康老等擢廣東都司
僉書平新興陽春恩平陽江四縣崗寇改福建備
倭未行會安南叛將范子儀圍欽州總督疏以兵
事委大猷大猷馳檄解其圍仍策之曰賊且乘吾
不備大集兵伺其至邀擊大破之追至安南界上
馘子儀而還論功進叅將捕瓊崖叛黎誅賊酋符
欽文壬子癸丑浙江溫台寧紹諸郡中倭急攻大